



CHINESE - JAPANESE LIBRARY  
HARVARD - YENCHING INSTITUTE  
AT HARVARD UNIVERSITY  
JAN 20 1940

210

T 4664/4244A  
4664





歷代名臣奏議卷之二十三

經代

宋神宗元豐四年秋河南府太守文彦博論西事奏曰近聞西師已

還中外但知時勢險惡而不知此疆中之音人情憂疑皆慮王師

必有昇舉之計老臣受國恩深冀向休戚備舉如此無快觀望亦有

區區報效之意不能遠致願為陛下言之臣竊慮陛下臨御以來選

拔將校訓練諸師使將治兵城守時時教養皆求備以不虞世所未有

此者夏人昏亂自致天討陛下儲養命將出師以伐其罪雖行以來

捷音屢上雖大能慮其乘虛伺隙而所行可說所慮實見先人

遺訓文政抗堂禮之鋒入敵師必不難也夫此也亦不

而致此進軍與動大眾須臾月餘變不復詳略之民處於

此宜為竭力奮勵之香不期其間而之亡野之

歷代名臣奏議卷之二百三十一

征伐

宋神宗元豐四年。判河南府太尉文彥博論西事奏曰。近聞西師已還。中外但知時暫歇泊。而未有分屯解甲之旨。人情憂疑。皆慮王師必有再舉之計。老臣受國恩深。義同休戚。齒髮如此。無復覲望。唯有區區欲報之意。不能緘默。輒為陛下言之。臣竊觀陛下臨御以來。選拔將校。訓齊師徒。脩治器械。儲峙糗糧。皆衆智所不及。近世所未有。比者夏人昏亂。自致天討。陛下赫然命將出師。以伐其罪。師行以來。捷音屢上。雖未能覆其巢穴。係其君長。而師行有紀。所遇輒克。羌人遁逃。莫敢抗堂堂之鋒。天威神武。震懾四夷。戰功之多。近世未有。然而數路進軍。興動大衆。彌歷累月。餽輓不貲。諸路之民。疲於供給。將士盡忠竭力。為朝廷奮不顧身。間關死亡。衝突寒苦。備極勤勞。臣以

謂國威既已振矣。將士之力亦已殫矣。百姓供餽亦已竭矣。為陛下今日之計。正當勞徠。將士安拊百姓。噢咻其疾痛。補完其瘡痍。使得蘇息。按甲養威。以全前日之勝。如此。則外足以懲艾夷狄。內足以愛養軍民。乃宗社無疆之休也。今若師徒暫還而復出。士氣已衰而再鼓。民力已困而調發。復興諸路深入而轉餉益遠。如此。則師之勝敗恐未可知。而前功或喪。此天下之深憂也。兼臣在洛中。津遣陝西軍須不少。亦聞陝西事體頗詳。皆言百姓亦已流離。菽粟之價騰踴。今冬二麥多不下種。將春農事方興。又復調發不已。必恐應副不前。有誤大計。臣而不言。孰當言者。伏望陛下以天下為度。以蒼生為心。不以盡敵然後為功。亟詔班師分屯諸路。使朝廷恩威並行。軍民和附。以小羌昏亂如此。可以坐待其滅亡矣。臣不勝大願。老臣愚忠憂國之心。不能自己。僭易冒聞。不任隕越。

五年陝西轉運使范純粹論西師不可再舉疏曰。臣伏見朝廷聚兵一道。以俟西討。將修築堡寨。聚積芻糧。為進攻必取之計。臣以非才。職專餽餉。雖前後累與同職官條具事狀。仰煩聖聽。然其所論皆區區餽運職事之所當言者。至于攻討得失之勢。城堡利害之實。師期之緩急。民情之戚休。所以繫朝廷天下之體者。則非臣之職。而前此未之言也。臣愚以謂。畎畝不忘君者。蓋臣子之常守。况臣世荷國恩。久叨器使。今事有所觀。而心有所懷。詎當以非職為間。而隱默自欺。此臣所以自信不疑。而欲言者也。臣切聞去年邊事之初。議者謂夏人昏亂。因辱其長。衆怨親叛。席卷可平。朝廷大治兵師。諸道並進。所向力戰。而賊巢不拔。則是與夫議者之言有間矣。今朝廷會兵涇原。欲為且城且戰之計。臣以謂精騎二十萬聚于一方。聲勢重大。彼必清野以避我鋒。決於他路犯邊。以為牽制。萬一乘虛入寇。則事可憂。

兼涇原進築之衆。所食糧米日將萬斛。所築城堡不過一二。而地里漸遠。餽運無可繼之策。時日漸久。丁夫有奔潰之虞。當此之時。勢必中罷。豈不負陛下興舉之意。而繫夷狄觀望乎。矧所城堡障深在賊疆。存守久長。豈敢自保。此又不可不慮者也。朝廷休養民力。充實府庫久矣。去歲兵師一出。而公私困弊。若此其甚。今者再議大舉。人氣事力。大非去歲之比。若今歲事功不就。即來歲又將如何。國財民力。將何以繼。此臣所謂攻討得失之勢。城堡利害之實者也。臣唯制置司牒。坐列調發時諸路兵馬之期。皆在六月。切計出兵之日。決是初秋。去歲涇原環慶兩路。各以九月出兵。比至中冬。漸以還塞。然猶士卒疾凍。十亡四五。今七月行師。方是苦暑。以二十萬之衆。冒犯炎日。或被堅禦寇。或負重力役。渴飲難周。瘡痍多有。復當大雨時行之月。豈無霖潦之虞。臣恐疾病傷殘。有甚前日。內外重兵。上繫國體。此臣

所謂師期之緩急者也。臣切見去年調夫出界。且上等人戶。有至獨出數十夫之家。其貧下人戶。亦須數戶共出一夫。每夫雇直至百貫。文又諸路轉運司。接續調發。至于再三。其間凍餒艱辛。若遇賊被害。死亡凋弊。久未可復。今茲再籍。百姓已諳事勢。人必駭畏。頗有逃散。薙麥在隴。秋禾將耘。妨奪農時。適於此日。緣軍興大計。動須人力。臣等蒙朝廷試以軍法。責令趣辦。若人戶大段流移。關內騷動。根本之地。事有可憂。異日言者。必以臣等為歸咎之地。一身之責。無足自愛。其如國事何。此臣所謂民情之戚休者此也。臣切謂朝廷興計。當萬全。而不當幸一時之無事。發而無成。前車可鑒。臣切與老于邊事之人。曲折講議。事可寒心。而中外之臣。妄意朝廷。謀身畏禍。無有為陛下言者。臣獨何人。特以忠義所激。不復以職事為間。寧受盡言之罪。于今日。而不忍被不言之罪。于他時。故敢以所得衆人之論。昧死

以聞。

晁補之上言曰。臣聞杜牧曰。國家大事。牧不當言。實言之有罪。則自以其書為罪言。安南之舉。賊臣輕言之。亦罪也。夫仁懷義率。智謀信結。而出之以勇。闐然而鼓。堂然而陣。身被堅執。銳奮臂大呼。以先三軍。使三軍之士進旅退旅。如驅群羊。始視嬰兒。與之往與之來。莫知所之。若是者。臣不能。布策挾龜。迎日計月。望雲上風。觀星候氣。雷聲雨沐。虹垂霧橫。暈珥光恠。背建向破。從孤擊虛。六窮三刑。望王囚死。以察害凶。以明利吉。使三軍之士。逆之以止。順之以行。不厭不疑。至死無所畏。若是者。臣不能。畫地聚米。稍險度夷。左青石白。前烏後龜。無當天牢。無處龍首。高陵知逆。背丘知向。林木之隰。葭蔣之陂。一迂一直。一亟一遲。使三軍之士。所由以入。所從以歸。交挂圯絕。不失地宜。若是者。臣不能。馳一乘之車。掉三寸之舌。不甲不兵。以行賊營。曉

以禍福。諭以利害。使賊交臂受事。屈膝請和。可以無戰而屈人之兵。若是者。臣不能。深溝高壘。清野以待。示以所害。欲戰不可。三時務農。一時習武。百姓家給人足。鷄犬相聞。使賊不敢南下而獵於嶺。東出而漁於海。微關棄傳。內外為一。若是者。臣不能。臣負不能之才五。且少孤不幸。墮在荆棘泥塗之中。荒楚幽穢。不得預聞下士之議。而私慕庶人。所以傳語者。是以不勝犬馬心。願効一言。雖然。凡所言者。亦非曰能之。特其理勢之然。否可道者也。自交趾犯順。侵軼郡縣。溪嶺騷然。檄書日聞。陛下仁愛遠民。若保赤子。憂勤宵旰。所以禁止安集者。臣雖不備行列。有目有趾。莫非王臣。故忘其怯懦。以自試鉄鉞之誅。謹參三驗。今先論其所宜勝。與所為未可取者。而次條愚計於後。以備執事者擇焉。傳曰。不先時而起。不後時而縮。又曰。敵加於己。不得已而應之。謂之應兵。兵應者勝。陛下以父道育四國。四國所宜

歡欣咸以子來。而交趾不道乃干大順。陛下謀於心。謀於卿士。以逮庶民。設壇授鉞。應而討之。兵應者勝。此其理勢必勝一也。兵起之初。五管莫備。賊至城下。帝合不知。而邕州刺史蘇緘。家世儒者。不識金革。汗馬之勞。卒遇大變。乃能奮不顧身。閉城乘壘。運關死轉。以嬰賊鋒。兵敗不屈。血染砧几。妻子女婦。駢頭為戮。將吏偕死者至數十人。遠近聳動。爭欲伏節前驅者。此其理勢必勝二也。陛下即位以來。精意武備。設監置官。以董軍器。釜鐵皮革。筋髡膠漆。精良百選。刀稍矛槍。戟楯蔽櫓。矢弩宵鎧。鼓旗笳角。凡軍之須。一切素具。北益黃河之水。以滿隋渠。南盡豫章之木。以為舩。一舩所載。當中國車數十量。舩艦相銜。以濟南師。此其理勢必勝三也。交趾之地。不過中國一大郡。叫呼跳梁。不足以越千里。疲弊空窶。不足以支數歲。陛下神武天旋。雷動莫不蠢然。况此小寇。制之得術。捐五管一城。足以當賊有餘。何

至嘒嘒以煩執事者。今析中國之衆。五一以伐之。如舉岱山壓鳥卵。此其理勢必勝四也。陛下謀臣計士。布列中外。適一事命一將。皆試可乃遣。而比歲更武舉之科。親延於廷。諏以計策。天下小兒孺子。莫不踴躍憤悱。爭試劍馳馬。指畫論議。以希功名。其作新振起。亦勇氣百倍矣。交趾徼外小國。其人腥臊雜處。非素知兵。能出奇合變也。乍聚乍散。非有常性。鈔掠奪擊。與邊人爭一旦之命。此如攫鳥逸獸。雖角牙爪。紫輕利足奮。而不知人能以機械罔罟獲之。此其理勢必勝五也。雖然。勝可萬全。而有未可取者。此事之情不可不察也。陛下方拓西疆。指圖授筭。以取熙河六城。如探懷中物。虜逃遁不敢窺境上。將狃近功。士飽新賞。帶甲十萬。東勝南指。有輕交趾心。臣以謂姑無謂交趾小蜂。蠱有毒不可忽也。傳曰。鳥窮則啄。獸窮則搏。人窮則詐。昔魯人與邾人戰。魯卑邾不設備。而禦之。邾人敗。魯使我軍不知察此。



交趾示弱以堅我。我迫其窮，使姦謀得恃，此其理勢或未可取一也。中國陰陽之中，土氣和適，其生物如之。故極寒甚熱，皆是傷病。百越之地，少陰多陽，其人䟽理，鳥獸希毛，故性能暑。三月五月，春草黃茅，嵐霧瘴氛，上炎下潦，颶風之所扇鼓，且土多毒蟲，蚺蛇沙虱，過而踣者，猶十三四焉。今以舉大軍宿之其間，久而不召，強者病，弱者死，奚暇爭功利哉？此其理勢或未可取二也。古者興師十萬，日費千金，故軍無輜重則亡，無委積則亡，無糧食則亡。臣請以漢賈捐之所論，羌軍質之，暴師曾未一年，兵出不踰千里，費四十餘萬。大司農錢盡，乃以少府錢續之。今交趾之遠，非特羌軍也，且輟畿內禁卒及調河北京東戍兵五六萬以伐之，倍道兼行，三月而後至，以臣計之，人日糲二升，則五萬人之費日千石也。行三月日千石，舍未畢，陳未定，而十萬石之粟去矣。使其淹回未有成績，其為費可勝言哉。孫子曰：智將

務食於敵，食敵一鍾，當吾二十鍾。芟一石，當吾二十石。此計平地千里之法也。今以京師直交趾五倍而言之，則何啻二十鍾二十石。而後可以當賊之一。矧其俗又非專以五穀為養也。木實草根魚鼈蚌蜃之為舖，且其土之所出，足以給其人安坐而待我。若此，雖十年不病闕食也。傳曰：粟不如者，勿與持久。持久非遠行之利。此其理勢或未可取三也。平陸之軍，習於車攻，闕於騎鬪，蹈蹂厚土，大步疾走，左旋右折，出入往來，蕩蕩坦坦，不可障阨，而以之入於東南之幽。前則重山，後則複溪，左則大阜，右則深谷，積石叢篠，車以摧輪，馬以敗蹄。擇土計地，若不容足，縱行則絕首尾，橫行則絕兩翼，往不知所返，而賊生死其地，其人如猱狄，下上坂險，筋力百倍於華人，倏起忽止，適去已至，從之如搏景，不可得也。傳曰：不用鄉導，不能得地利。地利者，兵之助。故孟子所記，亦先地利而後天時，而將士非素知此，其理

勢或未可取四也。畿內禁卒固天下之材選。賞罰素信約束素明。拳勇亦當百矣。然臣竊計之。設比營而擇。或取左遺右。或取右遺左。參差不齊。聚為一軍。則少非同巷。長非並舍。賚賜不偕。受調發不俱行。雖一之以旗鼓。晝戰目不能以相識。夜戰聲不能以相知。則臨事難濟。而河北京東之卒。又半雜新軍。廼孱貧窶。不任田畝。徒博飲酒。計窮力盡之人。乃起而為兵。一旦遂驅之戰。不惟不足勝。戈甲為病。而其往也。皆有戚戚羈旅之懷。夫戰勇氣也。氣不盈不可必勝。此其理勢或未可取五也。凡此較然易見。雖五尺童子能道之。而臣所以獨不自己區區為國私憂過計者。非以交趾果能為足拇病也。以謂遠勞王師。戰久不決。則事將不能無弊。不可不察也。夫交趾實古揚州之南境。自三代盛時。列荒服之外。不及以政。秦并天下。略定揚粵。以謫戍守。五嶺與越雜處。以至漢而任囂尉陀。亦數以其地叛。當是時。

有閩越東越南越東甌西甌。謂之百越。交趾百越之徼也。其國距洛陽南萬一千里。人皆雕題文身。項髻徒跣。俗相習以鼻飲。父子男女同川而浴。今其地負海倚山。阻險僻迂。師行之道。可以為正。為奇。為伏者。非特一途而已也。蓋漢初遣王恢韓安國擊越。亦一出豫章。一出會稽。時唐蒙亦使越。越人食蒙以蜀枸醬。蒙歸因又上書通夜郎。浮船牂柯。以出越人。不意其後路博德為伏波將軍。出桂陽。下湟水。按圖。湟水蓋出於連州。楊僕為樓船將軍。出豫章。下潢浦。按圖。潢浦蓋出於廣州。故歸義越侯二人為戈船。下瀨將軍。出零陵。下灘水。按圖。灘水蓋出於桂州。馳義侯發巴蜀罪人。下牂柯。牂柯即唐蒙所通道。起夜郎者也。於是五將軍咸會。越人或降或亡。南越平。為九郡。至建武中。交趾女子側貳叛。馬援將平之。援始自合浦緣海而行。隨山刊道。蓋千餘里。如浪泊。禁濞。無功。居風下雋壺頭之路。凡圖記可見。

往往援所行也。今其計謀所長不可得而知。所可知者其出入往來死生之地。髣髴具在。師行所從不可不察也。臣又以今言之。居後踵前固不必皆出前人之舊。而其大槩瀕湖以南要害之地。朝廷因以分屯迭進。至於明越餘杭海上諸郡。負海無障塞。中國所素不虞者。臣願亦粗修守禦備游寇。允此非特以待交趾而已。臣又以今料之。使賊能為狂計。固不出於三。若外有合交。據關守隘以老我師。我頓兵絕徼之下。曠日遲久。欲戰不可。引去則賊又復至。回軍轉陣返而赴之。賊又入保如初。如是數年。則邊人未有息肩之期。此計上也。若開關闢戶。誤我以利。誑我以弱。設計誘我。且戰且却。我易而不戒。乃亟入之以墮賊計中。賊度我歸。遠以奇兵斷後。我進無所得。欲退不能。此計中也。若棄關不守。鼓行出隘。唐突侵軼。疾戰自快。輕勇悍亟。分散四擊。大則劫城。小則掠也。其入吾之地恐不深。其爭吾之利恐

不及。我主彼客。彼輕我重。我衆彼寡。雖強可虜。此計下也。賊出上計。利在賊。出中計。利害半。出下計。魚爛亡矣。臣又以今料之。賊必不能出上計。何則。海外遠國。固非交趾之弱所能恃。雖近有群獠。又非固為交趾役也。况敢侮王國乎。意者輔車相依。唇亡齒寒。有不自安之心。今臣姑置遠者而不論。論群獠之近者。則亦不可無所以恃之。今見朝廷舉大兵欲滅交趾。彼其中能無介然疑似之心哉。臣獨計以謂誠能擇使者如酈食其。司馬相如。陸賈。班超等輩。乘駟持節以寬大鎮之。告以朝廷誅叛逆。賊即伏。行罷兵矣。能從中國討賊。及反間致頭首者。計所得以賞。以身從者。賞以身。以家從者。祿以家。以鄉從者。封以鄉。以縣從者。侯以縣。縱不能悉從。可以少定其志。則是不戰而賊之形已窘矣。臣又料之。賊無他助。其上計不能悉用。或者猶參上計而雜中計。參上計據關守隘。以老我師。我雖衆無所用之。請以大

軍當其衝。虛張形勢以疑賊。而陰擇精兵為三四間道絕徑。或薄其左。或突其右。設奇取之。兵法所謂攻其所不守也。昔蜀蓋維拒劍閣。鄧艾乃潛自陰平。行無入之地。七百里。鑿山通道。崎嶇險絕。以毡自裹。輪而下。士卒皆緣崖攀木。魚貫而進。卒降劉禪。此設奇者也。雜中計。開關闢戶。以誘致我。我雖衆。亦無必入。請留大軍。屯其後。而以驍銳佯從之。輕足利兵。以為前行。分屯折隊。伏於兩傍。勿薄。勿迫。遠而挑之。偶勝無追。不勝疾歸。棄金遺鼓。拔衆以馳。賊貪吾獲。可邀於阨。卒前遇伏。其衆必覆。兵法所謂引而去之。令敵半出而擊之。利者也。昔北戎侵鄭。公子突曰。使勇而無剛者。嘗寇而速去之。君為三覆。以待之。戎勝不相推。敗不相救。先者見獲。必務進。進而遇覆。必速奔。從之。遂破戎師。此設伏者也。賊出上中而不利。將悉衆偕出。以徼幸於其下計。是固中國之利也。請剋日而取之。昔魏祖伐關中。賊每一部

至。魏祖輒喜。破賊。諸將問其故。魏祖曰。關中道遠。賊若依險阻。征之不一二年。不可下也。今皆來集。衆雖多。軍無適主。一舉可滅。諸將皆服。語曰。運難不俱棲。可離而解。賊衆之謂也。此三說者。譬之丸。不能出於盤。其大槩如此。然兵無常數。故隨所動而應之。前必有滅竈之說。而後繼之者。得以起添竈之智。顧為陛下將者。何如耳。賊出下計。而又不利。將大走遠遁。亡海絕道。以保窟穴。臣請按甲勿從。或曰。按甲勿從。何以立威於天下。曩士卒所以犯晨夜。冒白刃者。懼不勝。使幸勝。奈何幾舉而棄之。且賊窮窮無所知。此如兩鼠鬪穴中。將勇者勝。臣則以謂不然。兩鼠鬪穴中。將內鼠勝。且欲搏賊大海之間。其勢必與之相從。於舟楫。夫使吾三晉齊魯之人。失夷曠而為樓船鬪艦。浮之紅爛之中。平居無事。自亂心悸。而况乘以倉猝微風。搖檣一夫蕩櫓。我衆駭矣。又何暇與之校強弱勝負哉。蓋前世語水戰。以謂越

人能入水負舟而杜牧所傳鄭年者能沒海履其地五十里不噎今海上賈人亦往往遇水寇鑿舟沉焉此其非中國所用以取勝故也故臣請按甲勿從而更設策修備以待之且陛下富有天下地漸日月之窟府籠山海之藏非以交趾羸陟安定勾漏靡零曲陽比帶稽徐西于龍編朱戴封溪望海卑陬不毛方尺圍寸之地為足有也又非以交趾生犀馴象古貝文螺琥珀翡翠麕皮鮫革蕉紵桂蠹詠竒不法殫瑣極細之物為足寶也不得已而問其罪足以威懾小寇使之悔過効順歸命中國而已賊既定臣請循古更選仁厚勇略堪任將帥者以為五管諸州刺史太守以歲月鎮撫其民而因其家之可任者置主兵如保甲以時教習士兵之外乃募游軍而就擇將吏其地平居無事謹養而善別之以周知其心有故王臣失勢欲復見其功者聚為一卒有死事之人昆弟欲為之報仇者聚為一卒有貧窮

忿怒將使其志者聚為一卒有故贅壻人虜欲昭迹揚名者聚為一卒有故胥靡負犯之人欲逃其耻者聚為一卒加賜而時慰焉使之居其地服其俗安其水土使其械用因其糧食得以無煩執事而坐制其弊乃可以得志此百世之計也臣身非安南將吏民庶又不親與交趾接也安能周知其虛實短長利害所在曰今日出某道取某地明日出某道取某聚某道可以為正某道可以為竒某道可以為伏意者其大槩理勢之所在故臣得以臆計胷度而妄議焉若夫知己知彼每舉不殆與敵變化循環無窮提軍挈衆動於九天之上此則大將軍之任非臣所得而前知也臣愚疎外不知事體昧死陳愚計

哲宗即位守門下侍郎司馬光請革弊劄子曰臣伏見陛下自臨政以來夙夜孜孜以愛百姓安國家為事蓋善治疾者必究其所未攻

其所急救之欲速去之欲盡。臣觀今日公私耗竭遠近疲弊其原大槩出於用兵。夫兵者凶器。天下之毒財用之蠹。聖人除暴定亂不得已而用之耳。自有唐中葉藩鎮跋扈降及五代羣雄角逐四海九州瓜分糜潰兵相吞噬生民塗炭二百餘年太祖受天明命四征弗庭光啓景祚太宗繼之克成厥勲然後大禹之迹悉為宋有於是載戢干戈與民休息或自生至死羊及期願不見兵革吏守法度民安生業鷄鳴狗吠煙火相望可謂太平之極致。自古所罕伴矣。及神宗繼統材雄氣爽以幽薊雲朔淪於契丹靈夏河西專於拓跋交趾日南制於李氏不得悉張置官吏收籍賦役比於漢唐之境猶有未完深用為耻遂慨然有征伐開拓之志於是邊鄙武夫窺伺小利敢肆大言。祇知邀功不顧國患爭價餘勇自謂衛霍不死白面書生披文按圖玩習陳迹不知合變競獻奇策自謂良平更生聚斂之臣。捃拾財

利剖析秋毫以供軍費專務市恩不恤殘民各陳遺利自謂研桑復出相與誤惑先帝自求榮位於是置提舉官強配青苗多收免役以聚貨泉又驅畎畝之人為保甲使捨耒耜習弓矢又置都作院調筋皮角木以多造器甲入養保馬使賣耕牛市馱駿而農民始愁苦矣。部分諸軍無間邊州內地各置將官以領之自知州軍總管鈐轄都監監押皆不得關預捨祖宗教閱舊制諸射法效胡服機械陳圖競為新奇朝晡上場罕得休息而士卒始怨嗟矣。置市易司強市推取坐列販賣增高稅色件及菜果而商賈始貧困矣。又立賒貸之法誘不肖子弟破其家。又令民封狀增價以買坊場致其子孫鄰保籍沒貲產不能備償。又增茶鹽之額賤買貴賣強以配民食用不盡迫以威刑破產輸錢。又設措置河北糴便司廣積糧穀於臨洺州縣以備饋運。教兵既久積財既多然後用之而承平日久人已忘戰將帥愚懦。

行伍驕惰。加以運籌決勝者。乃浮躁巧偽之士。不知彼己。妄動輕舉。是以頓兵靈武。力疲食盡。自潰而歸。執兵之士。荷糧之夫。暴骨塞外。且數十萬。築堡永洛。怠忽無備。縱寇延敵。闔城之人。翦為魚肉。曾未足以威服戎狄。而中國先自困矣。先帝深悔其然。厭截截諛言。思番番良士。及下哀痛之詔。息兵富民。奄棄天下。此臣所為痛心疾首泣血追傷者也。伏惟皇帝陛下。肇承基緒。太皇太后同聽庶政。首戒邊吏。毋得妄出侵掠。俾華夷兩安。今契丹繼好。秉常納貢。乾德拜章。征伐開拓之議。皆已息矣。則此置提舉官。散青苗。歛免役錢。黥教保甲。置都作院。養保馬。置將官。市易司。封狀買坊場。增茶鹽額。措置河北。糴便司。皆為虛設。陛下幸詔臣民。各言疾苦。其已至者。千有餘章。未有不以此數事者。足以為天下公患。衆人所共知。非臣一人之私言也。利害著明。皎如日月。何所復疑。而羣臣猶習常安故。憚於更張。雖

頗加裁損。而監司按堵。將官具存。保甲猶教閱。保馬猶養飼。邊州屯戍不減。軍器造作不休。茶鹽新額尚在。差役舊法未復。是用兵雖息。而公私勞費猶未息也。如此因循。不知改轍。數年之後。萬一遇水旱大飢。盜賊羣起。其為國家憂患。豈敢盡言哉。伏願陛下。斷自聖志。凡王安石等所立新法。果能勝於舊者。則存之。其餘臣民以為不如舊法之便者。痛加釐革。雖非一日可行之事。欲乞陛下宣諭執政。令因臣民上封事。熟議利害進呈。以聖鑒裁決而行之。昔夏遵禹訓。商用湯法。周循文武之典。蓋創業垂統之王。貽厥孫謀。後世所宜謹守。不可失也。若凡百措置。率由舊章。但使政事悉如熙寧之初。則民物熙熙。海內太平。更無餘事矣。議者必曰。革弊不可倉猝。當徐徐有漸。此何異使醫治疾。而曰勿使遽愈。且勿除其根原。使盡也。其為醫者謀。則善

矣。其為疾者謀矣利哉。

李薦上慎兵論曰。臣聞兵不可好。好兵者嗜殺人者也。戰不可忘。忘戰者棄民者也。臣嘗原兵之理。我克敵。敵克我。要之各有相傷。為民父母。奈何使民兩自相傷。中道無罪而實生哉。萬一正不獲意。則權必用武。乃濟。然後哀於愴惻而用之。以犯難。難平即止。非復可玩。此以殺止殺。以戰去戰之術也。司馬法曰。不違時。不歷民病。所以愛民也。不加喪。不因凶。所以愛夫民也。冬夏不興師。所以兼愛其民也。後之人君。豈卹是哉。爭城則戰矣。爭地則戰矣。爭長則戰矣。爭利則戰矣。小忿則戰矣。違言則戰矣。代翁代張。代存代亡。民不加多。率以戰死。獨何辜哉。今日暴原野之白骨。乃昔日暴原野白骨之子孫也。人君當視人猶己。以己推人。則好戰之心自平。夫士卒之痛。思己之痛。士卒之傷。

思己之傷。矢石在前。白刃在左右。法令在後。萬死之間。幸於一生。其危心如何。彼貴賤雖異位。而喜懼好惡之心無二。况復殺一人。則父母妻子失所。而無依者數人。或至於殺其子孫。則嗣續遂絕者。夫推愛物之心。猶不忍暴殄天物。况人乎。不戰而屈人兵者。正慎於此。故觀無衣之詩。然後見興師之情。觀揚之水之詩。然後見屯戍之思。觀葛生之詩。然後見戰歿之感。迨夫民日益寡。國日益削。力日益屈。財日益殫。於是惻然哀恫。其前非殆矣。主父偃曰。務戰勝。窮武事。未有不悔者。豈特悔而已。禍亦隨之。夫二世為將。道家猶且忌之。况好兵之主乎。故禍莫大乎好兵。好兵之心有二。曰幸。曰侈。孔子曰。不仁者不可以長。處樂。不可以久。處約。惟樂與約。處之實難。自匹夫至於天下國家。其召禍之漸。均生於有餘不足。有餘則侈心生。不足則幸心生。幸心



之禍在厥身。侈心之禍在子孫。今夫國迫小而鮮長慮。財褊急而多妄計。貪而無謀。勇而無禮。惟試僥倖於一戰。萬一償志。於是乎幸心生矣。幸心一生。故不量力。不度德。而所較非其敵。志徒大。心徒勞。而所求非其道。如知投石。如指撓滂。自求危難。屠其城。夷其社。覆其宗。絕其嗣。者踵相及。孟子所謂緣木求魚。必無後災。以若所為。求若所欲。後必有災。是也。不足為有天下者道。若夫燕安閒暇。財豐力富。旁視四顧。無一不可。惟外事四夷。然後快意。於是侈心生矣。侈心一生。故好大喜功。而不以生息元元為念。窮兵黷武。惟以無伐功為愧。自求憂患。因役傷財。得寸損尺。怨滿天地。而禍及子孫。衆仲所謂兵猶火也。不戢將自焚者。是也。前王既以此致凶咎。後王當以此為龜鑑。古之好兵無功。而其主非賢者。不足道。好兵而賢且有功者。莫若漢孝武。

唐太宗。夫孝武席高祖文景之餘休。太倉有紅腐之粟。內府有貫朽之錢。故放心肆欲。玩兵耀武。以事疆場。內則有期門羽林。孤兒飲飛。騎士之兵。外則有六郡良家材官之士。總節制以統軍。則有衛將軍之智。提孤軍以深梁。則有若霍驃騎之勇。又有李廣。程不識。蘇建。貳師。安國。嚴助。李息。徐自。荀彘之徒。以帥偏師。楊僕。路博德。李蔡。王恢。李陵。李沮。公孫賀。公孫敖之徒。以將別部。擊匈奴。救東甌。平南粵。誅昆邪。平西羌。伐朝鮮。征大宛。乃置朔方。滄海。武威。僞耳。牂牁。樂浪等二十四郡。厥勳偉哉。太宗以英雄神武。戡定禍難。以基王業。自偏裨小校。至於為帝。大小戰無慮累百。未嘗挫衄。有若李勣。李靖。柴紹。衛孝節。薛萬徹之徒。以平突厥。有若道宗。道彥。樊興。宗。段志元。高甌。生之徒。以平吐谷渾。有若侯君集。薛萬均之徒。以平高昌。有若李襲譽。李大

亮之後以平延陀。有若牛進達之後以平吐蕃。有若郭孝恪之徒以平馬耆。有若李子和。齊善。張士貴。張德寶。上官懷仁之徒以平諸獠。有若契苾何力。阿史那。社爾之徒以平龜茲。邦國既底寧。諸盜既勦絕。其餘勇故氣猶未肯寧。晚命馬周。李勣。張儉。張亮為將。統十六總管之兵。復遠駕遼海。親征高麗。厥勳偉哉。以漢武唐太宗之伐功。度越前世。所殺敵人。固不可億數。然士卒物故亦已多矣。故君子曰。房太子父子。庶人承軋兄弟之讐。實由於此。臣故曰。兵不可好。禍莫大於好兵。好兵之禍。既無近殃。則慎用兵而重民命者。其得福必永矣。或曰。子論兵而以好兵之禍為先。奈何為驚人主心。兵可去乎。臣曰。知戰可慎。民可愛。兵可整。而不可玩。禍可去。福可就。然後可以用兵矣。書所謂知稼穡之難。乃逸之意歟。故曰。仁者愛人。惡人之害人。義者循

理。惡人之亂紀。以茲為兵意。是乃仁術。又安可去。太祖皇帝昭受昊天之感命。市不易肆。兵不血刃。與漢唐百戰以得天下。固已異道。五宗相承。奉之以德。雖間用兵。兵出有名。未嘗有漢唐之侈心。則基福而遠禍也。其已久矣。陛下紹大統。繼大烈。可垂拱無為。以荷天休。然內寧必戒外。居安必慮危。故戰不可忘。兵未可去。戰雖不可忘。當念民命之可重。兵雖未可去。當念好兵之貽禍。鑒眎漢唐之侈心。緝熙祖宗之多福。故有曰。今太平可恃。四夷無虞。宜毀兵革。銷鋒鏑者。自弊之論也。願陛下勿聽。或有曰。今太平有餘。四夷可討除。宜興師旅。闢土地。是召禍之論也。願陛下勿聽。臣願陛下妙選將帥。必求其良。訓練士馬。必致其精。謹烽候。繕甲械。積芻粟。完城壘。以待四圍。不害中國之為強。脫若嬰吾。吾以逸待勞。以直待曲。真天子之兵也。

欽宗靖康元年兵部侍郎李綱上言曰。臣伏領御批降付臣僚  
所上奏劄。不知何人所陳。皆與臣意暗合。乃知今日不為無人。  
在陛下採其說。斷而行之而已。唐韓愈有言。不赦不疑。惟天子  
明。凡此蔡功。惟斷乃成。正謂此也。易於謙之上六。稱利用行師。  
征邑國。於師之上六。稱大君有命。開國承家。小人勿用。蓋謙之  
極。非利用行師。不足以濟功。師之成。非戒用小人。不足以保治。  
今陛下之於金人。卑辭厚幣。靡不順從。其謙極矣。然金人驕悖。  
愈甚。其勢非用師。不能有濟。以臣料之。不得已而用兵。其功必  
成。然功成之後。在陛下以小人為戒而已。臣愚伏望聖慈深考  
聖人之言。斷自淵衷。無為浮議所動。則大功一成。中國數十年  
可以無夷狄之患。不然。憂未艾也。所降奏劄。更容臣來早將上  
面稟聖訓。謹錄奏知。

御史中丞許翰上言曰。臣聞虜方駐營朔野。闕兵太行。而种師  
道兵距河未渡。此挫師之銳而示敵以弱。臣以為非便。昔董卓  
自言討先零日。留司馬劉靖屯兵安定。以為聲勢。虜欲斷卓歸  
道。小擊輒開者。以安定有兵故也。虜謂安定當數萬人。不知但  
步騎四千而已。故知兵之勢。要恃聲援。非必實加之也。今我控  
扼狼車。而大兵渡河。號十萬眾。此足以震敵人之心。而增諸鎮  
之氣。欲戰則可以及事。欲和則易與之講。此賢於老師不用。而  
縱敵殘暴。何啻萬萬也。願陛下下臣之言。詔大臣與种師道熟  
議其便。然臣累論种師道。今不可廢。已蒙聖慈許令。師道制置  
河北。戎事之機。間不容髮。而達今十三四日。未聞施行。今雖用  
師。道言恐亦未必能盡其心。以朝廷任之不專。信之不一。故也。  
更望睿斷。早圖任之。

翰又論戰曰。臣伏見金狄退師以來。朝廷措紳上恬下嬉。幸於無事。恃以為安。而臣獨竊終夜不寐。方以為憂。夫以夷狄之性。貪恠無厭。而我既示之以弱。開之以利。不過一二歲。勢必復來。自所割三鎮。疾馳三日。則突騎犯都城。飛塵入宮闕矣。當此之時。金帛不可復得。地土不可復割。遣鄙之師不可復召。智能之士不可復圖。萬世之變可勝言哉。今聞姚古等兵已次國郊。切謂陛下可以閫外之事制於將帥。若遣一介之使。可下下之。使不可下。則用兵不疑。臣嘗熟計我戰而勝。則蒙福無窮。戰而不勝。則北阮并陜。西斷太行。內守大河。國固無患。虜以殘弊將歸之。兵力必不能取三鎮。故我勝亦利。不勝亦利。此可決戰一也。虜欲既盈。將驕卒懈。時益暄濁。人馬喘汗。以我方銳擊其墮歸。此可決戰二也。我衆彼寡。以十當一。反顧者誅。旋踵者斬。使威

令既必。則羸弱者奮。况於關陝百戰之士。外誘以金縷。而內激以憤。破賊必矣。此可決戰三也。神師道持重名將。今雖老疾智略足恃。議者見其木訥。若無策畫。此蓋不以口擊賊者。昔趙括論兵。其父奢不能難也。而奢謂括將必敗。趙師。宋文割據江左。聞王元謨論兵。飄飄有伊洛間意。及使之。望風奔潰。聞師道自少沉毅。蓋自天性。介冑之士。瞋目語難。自古而然。未可遂疑。况今濟以姚古。必能相與成功。此可決戰四也。陛下仁聖誠動萬姓。義感三軍。人人思為國死。以滌中原之耻。而發七廟之憤。夫天時易失。而人心難收。陛下今不乘此利勢。後必悔之。此可決戰五也。今全軀保妻子之臣。務在張虜聲勢。虛喝恐劫。苟安目前。遺患萬世。此其意亦無他。不過慮戰不勝。則咎歸議者。使身不利。今一主和。身保無患。明年盛秋。胡騎復來。則必諉曰。國

家事狄不至。不得歸咎和者。姦回自營。孰便於此。非復有為陛下宗廟社稷長慮却顧者也。夫一勝一負。兵家常勢。要觀大計如何爾。議者以姚平仲前日妄動小劔。以謂王師不可復用。傳曰。凡此蔡功。唯斷乃成。故願陛下斷之而已矣。

翰又論三鎮曰。臣伏見王師既行。而廟筭未定。此疑事也。古今蓋未有能以疑事成功者。故朝廷之意惑。則將帥之心不一。將帥之志分。則士卒之氣不銳。斷而必行。鬼神避之。此精誠之力也。陛下欲斷今日之議。當究為和與戰。卒將如何而已矣。其中小小利鈍。非大計之所繫也。昔漢高帝蜀先主皆號聰明神武。為一代之英雄。考其用兵。敗北無數。然其志氣挫而愈厲。絀而更揚者。大計已定於中。斯其所以為英雄者也。陛下欲決和議。則臣願陛下取太史公記虞卿傳覽其往復。此往古之鑒也。方

今若失三鎮二十州之地。則天下之勢已斷。西北無河東。則陝西不可守。無河朔。則汴不可都。計不過謀渡江南。臣老永嘉渡江。能為東晉者。乃有王導謝安英賢相繼。扶危救傾。僅能立國。而中原丘墟。遂陷胡貊。使世無王導謝安之才。或有而不見。施用。則東晉割據猶恐未易為也。借使能為東晉。宗廟可復立也。社稷可復建也。盜入陵寢。取一抔土。則將若何。言而至此。可流涕。陛下永念方來之艱。則今日雖復勞動。天下猶不得已。何者。擇禍莫若輕也。或者以為太祖即位以來。未有江南晉蜀。而卒能混一區宇。臣以為不佞。太祖生長兵間。非若陛下繼體守文。建隆將士百戰精銳。非若方今將不素養。兵不素練也。虜在掌握。縱而不取。使益張大。復何以敵。不待以太祖言。故凡守和之計。以國與人者。陛下欲決戰。則臣之所陳可戰者五。已具于前奏矣。今使虜不辭城。則渡河之

師當戰。戰則必有漕運之役。有應援之兵。有扼據之要。皆當素治。不計小却。但責成功。而後將帥志一。而士卒氣奮。三鎮之守。有死無二。若我以疑遣將帥。以苟行。則精銳已亡矣。何以取勝。今為和議者。苟取目前之無事。則又未必可取。臣聞西北之民。人人相語曰。吾屬與其為虜。則寧南向作賊。死且為中原鬼。使三鎮之兵。不發忿怒。入為寇攘。非小變也。故姑息目前。亦未為得。况又方來之患。未知所稅。駕與。自古用兵。必有異議。成王之時。周公東征。民獻十有十夫。予翼而已。其他罔不反曰。艱大。晉武與杜預謀取江南。大臣皆充等皆力爭之。獨一張華贊定大計。唐憲宗用武元衡裴度謀討吐西盜殺元衡。朝廷震恐。請罷裴度以安諸鎮。憲宗大怒。討蔡益急。吐唐之威。令自是復振。周世宗初。即停漢引契丹入寇河東。世宗自將。知宗之宰相馮道。固爭不得。周之功烈。自是遂興。書曰。惟克果斷。乃罔以難。陛下所以

疑者。度衆必以姚平仲前日之無功。自比其說。臣近問种師道。平仲所以不利者。師道為臣言。劫寨之法。不用大兵。當小擾之。使自蹂藉。而後可乘。又地勢入橫河中。度兵隘橋。以利誘使出戰。不利以兵入。闔也。臣是以知師道之有謀。故前日之功。失在不用老將。而用驍勇。不恃謀將。而恃辭說。非兵不當用也。昔石晉開運之變。契丹始入。敗不窮追。冬復大來。遂陷都城。國朝景德。契丹入寇。澶淵之役。亦不窮追。而虜和親。夫開運景德。驅逐之策同。而成敗之效異者。何也。開運之時。中國方弱。而示之以畏。故虜復來。景德之間。中國正強。而受之以和。故虜遂定。今議者不鑒開運繼敵之患。而欲為景德之寬大。則可謂不知時矣。陛下何不試使議割地者。身任數年虜不復入。臣知議者必將難之。夫為國不保數年之安。而欲定萬世之策。必不然矣。願下臣章。使有定議。

晁說之出行議曰。居其所而衆星拱之者。北辰也。乃一夕不居其所。隨衆星以流焉。天將無四時也。商詩不云乎。邦畿千里。惟民所止。肇域彼四海。非邦畿以止民也。實止民以為邦畿也。其能止千里而近者。斯能域彼四海之遠也。若夫千里不為我畿。則四海將為他人域矣。周詩亦曰。价人維藩。大師維垣。大邦維垣。大宗維翰。懷德維寧。宗子維城。無俾城壞。無獨斯畏。傷厲王失是也。民不懷德。而城壞矣。烏覩文武成康之績哉。是故國君死社稷者。禮也。後世有以身保一州。勇捍一城者。為希世偉烈。無他焉。不學也。之過也。聞之國君死社稷矣。而大王去邠。詩人不刺焉。何也。曰。大王去邠。以興周也。時則商之衰世也。紀侯去其國。春秋又不貶焉。也。曰。紀侯去其國。以存其祀也。時則周之衰世也。若使當商周之。君盛世。則紀侯者。王帛朝貢之不暇。寧論於其國去不去耶。春秋於紀侯。信不貶矣。而於周王

則有譏焉。書曰。天王狩於河陽。蓋天王無出。出則自絕於天下也。天子之孝在天下。諸侯之孝在一國。所任不同。所責亦異也。漢文帝時。老上單于。自將十四萬騎。入蕭關。燒回中宮。候騎至雍。烽火通甘泉宮。可謂危矣。帝乃躬探甲冑。思親征焉。其後匈奴復大入。帝親勞軍至霸上。及棘門。而在細柳。則黃輿屈而不行。驅矣。未聞其輕出狩也。既而景帝立。一日中七國同反。帝命周亞。八嘗嬰將三十六軍。以伐之。有張敖之力戰。韓安國之持重。韓頽當之功冠諸侯。而趙涉劇孟。鄧都尉輩為之謀畫。七國王侯之首。可指口。而旌之也。惟帝之斷足。以誅御史大夫晁錯。其勢足以使太常表。使吳。其明足以容周亞。夫之不奉詔。以梁委吳。亦未聞其輕出狩也。也。明皇有始無卒。昏淫不道。固非文景之比。而國家之盛。不減文景。也。一旦安祿山以范陽。平盧河東之師。率同羅奚契丹室韋十五萬衆。反范陽。取河北。陷東

京克桃林而潼關失守。則不告宗廟。不顧九族。不論百官。身與宮宦數十人。搗衣而奔。才行四十里而無食飲。道士不肯行。則斬宰相。縊妃子。僅行中道。散七甘言強之而前。不敢言騎驟之疲也。受辱以酒之微臣。悲歌酸鼻。若悔而不悔。唐室自且宗幸陝。德宗幸奉天。皆脩明皇故事也。未有也。昔祿山之初叛也。四方郡縣有不從賊。祇以起兵。其終賴太子即位於靈武。以固工。豈不願其留而無出哉。梁武帝區區好無兵。登叛人為謀。未納侯景十有四州之地。自詎知其相朱异納景之賂。其子王德通景之謀。坐獲非常之大功也。不。崔航石頭城與浮苴等也。景逼帝坐白刃交前。而景徒能焚宮室。辱

妃主。殺百官。曾不自保其首領也。梁室不碎於景之手者。武帝坐朝如故。而未嘗議及奔亡。符堅之秦。軍聲國勢據中原。以威百戎。非江左可擬也。銳氣以攻。衰微之晉。戎卒六十萬。介馬二十七萬。下蜀漢之舟師。擁幽冀之陸騎。軍實萬里。齊聲並進。晉謝石之師。不足以當慕容暕。垂姚萇輩。熊虎百戰之將。而融陣逼淝水。從幼度之誘。一動而奔潰。不可制止。融擒而堅僅以身遁。姑得道洛陽而入長安。曾不宴席而復出。五將山。姚萇執之。幽于新平別室。而縊死。斬傳國寶。以陳義問。尹緯以憐才於時。垂與子寶中道叛。而燕復以興。乞伏父子繼以隴右叛。而秦以立。句町王以河南叛。姚萇以萬年叛。慕容冲兵起於帳下。慕容暕變發於會中。誠可懼矣。向使堅收散卒。不去長安。任權翼符越之忠謀。督張蚝石越毛當苻飛龍之力戰。則何處有五



將之辱。新平之禍。使秦遂亡乎。執事者鑒漢文景不出而隆盛。唐明皇出而衰亡。梁武不出而存。苻宣昭出而亡。則一反覆手間。天下之利害斷可知矣。又有往古實迹可按而為執事言者。燕太祖文明帝以新造之邦。出師小勝。而激石虎之趙大陣以臨之。一日亡其二十餘城於趙。趙兵將逼所都之棘城。銳懼欲出亡。其帳下將慕輿根諫曰。王一舉足。則成彼趙之王業。中趙之計矣。今國家固守堅城。其勢百倍。事之不濟。不失於走。奈何望風委去。為必亡之理乎。元菟太守劉佩曰。事之安危繫於一人。大王當自強以厚將士。不宜自弱也。其謀臣封奕曰。虎凶惡已甚。鬼神共疾。禍敗之至。何日之有。今空國遠來攻守。勢異。戎馬雖強。無能為也。頓兵積日。虜啗自生。但堅守以俟之耳。燕乃以劉佩之力戰。大敗趙師。終為大國。視石虎不義以死也。是尤宜今日之所當知者也。所謂黏罕斡離不者。非石虎之儔也。其

凶淫不道。則過之。我不可一舉。是以自弱而成賊計。惟堅守以成百倍之勢。而視其明神誅殛可也。况我祖宗基業之固。宗廟社稷之靈。今天子之勤儉圖治。固非新造之燕可同日語也。亦竊有可懼者。今之謀臣視封奕如何。其戰將視劉佩又如何。執事者未宜忽於斯也。又如燕幽帝慕容暉。屢敗於晉大司馬溫之師矣。溫棄勝至枋頭。瞻懼焉。與大傅評謀奔龍城。賴吳王垂請出戰。曰。若其不捷。走未晚也。果大破溫於襄邑。而得晉之壽春焉。此則危甚矣。無足為執事者陳之也。今之謀臣必不為慕容評。而我將視慕容垂又如何。執事者復宜念之也。是二者蓋有前比矣。光武初在河北。得邯鄲信都二郡之助。而兵衆未合。議者多言可因信都兵自送西還長安。獨邯鄲曰。若明公無征伐之意。則雖信都之兵猶難會也。明公既西。則邯鄲城民不肯捐父母背城主。而千里送公。其離散亡逃可必也。光武不復西。

而卒因二郡以一天下也。方光武創業之初，猶不肯散亡二郡之衆。而固守河北，執事者謂今累聖重光之基業，可不恤京師之衆散亡而固守天下乎？嗟夫！魏去棘城，晞奔龍城，則燕雖興而復亡也。光武輕去河北，則不能中興，而漢不得復有天下也。執事者幸少念之也。或曰：晉元帝之亡也，保江東而興王業，胡為而不可？曰：元帝以琅邪王渡江而即帝位，非驅黃屋以東巡也。其所以即帝位者，又豈特藉江山之固哉？中原名德之士，主導周顛之屬，不忘中原之故國，相與慷慨垂涕而立宗廟於荆棘之中耳。是時東晉之地，南抵壽春，北極彭城，東至洛陽，如使元帝居洛陽之舊都，收中原之遺英，則彼劉淵、石勒輩果何有哉？請以二事明之。東晉之初興也，弱矣。劉琨遙奉朝廷之威命，無日不戰於劉石間，幾興而敗，且使琨不死，則滅劉以興晉陽，殺石勒以固河北，而洛陽、長安皆晉之歸也。祖逖志在中原，琨

之所畏也。其在豫州，百姓襁負而至，將士樂為致死力，胡寇不敢窺兵。石勒遣吏護其母墓，黃河以南復為晉有，畧地千里，復戶萬計，惜不能自成其渡江之志而卒也。晉之末尤衰矣。大司馬溫之師，猶足以至霸上。劉裕之師，又足以入長安。况在元帝初興乎？其初則未有定分爭先破竹之勢也。其後則強箭之末，飲羽之勢也。琨、逖二人者，元帝可用而不能用之，以一天下者也。溫、裕二人者，不生於元帝之時，使之効忠佐王者也。執事者當念琅邪王渡江失計如此，况以天子之尊為江東之舉乎？豈不惜哉？昔人所謂目前可驗，天下共知之事，區區所陳往事是也。其在本朝，則章聖皇帝因契丹再入河北，不西狩蜀，不南狩金陵，上有畢士安之深謀，下有高瓊之竭忠，而成之於寇準之決策，不復徘徊而徑幸澶淵，其流福天下至今賴之也。是則不待說之之言，而執事者宿知之矣。

說之又上負薪對曰。臣伏惟今上即位元年正月初。金賊以我疆場之臣無狀。斥候不明。遂奔突河北。蛇結河東。直抵京師城下。金賊非漢光上單于之比也。其兵亦無老上單于十四萬之衆也。彼時烽火照甘泉宮。望長安猶踰百里而遠。今何為使我直有城下之師。犯孔子春秋之大禁。天其或者警懼漢文帝者。猶淺與。負薪憂其九失。而有三策。皇帝陛下初下親征之詔。遠邇聞之。靡不思奮。咸曰。是我太祖皇帝之舊章也。今皇帝真似之也。太祖皇帝受天眷命。即位之四月。昭義軍節度使李筠叛。習五代之餘。鬻自恃其兵馬之勇。可稱其河山之壯。太祖親征。倍道兼行。其勞至於聖躬負石馬上。使太行不得以為險。即日城破。筠投火以死。蓋是舉也。樞臣廷祚為太祖獻策曰。宜出師擊之。西京向拱曰。陛下宜速濟大河。歷太行。稍緩之。則使賊憾矣。控鶴左廂都校馬全義亦於澤州城下進言曰。緩之適足以

資其姦便。全義中矢拔去。被血以先士卒。筠不得不與火俱滅之速也。是歲九月。揚州李重進自謂周室之勳舊。繼以叛聞。太祖親征。復如澤潞。介馬不脫鞅。重進復如李筠。與火灰燼。筠則北結劉旻。重進亦南通李景。其禍心不淺。而不及掩耳於迅雷。則奈何嗟夫。金賊之勢逼於前日。而鑿輿之出異於前日者。陛下無謀臣如廷祚如拱。而將無如全義者乎。如其有能成陛下之初志者。天地為之威怒。風雷為之震驚。跛者起而喑者呼。寧論女子童稚奮袂之勇哉。或曰。如陛下即位之初。何曰。陛下即位之初。孰如太祖。當宋之為宋。方四月之初。或曰。論兵則我寡彼衆。曰。戰之勝負。不在兵之衆寡。而在將之能否。有古以來。不可勝言也。莫若以今事著明之。太祖在周時。以百騎却虜梟將高模翰之兵數萬於瓦橋關之北。開寶初。太祖命田欽祚以兵三千於定州背城以破虜六萬。于時軍中有三千打六萬之

謠。至今塞上兒童猶以此語為戲不忘也。借曰兵寡。豈無三千背京城而陣。當見人人如田將軍也。關北百騎則待陛下之臨。戎復如真宗皇帝。改元之二年。乘六龍。幸大名。北虜不及望天戈。而大敗遁去。越五年。再御龍轡。幸澶淵。北虜繞及望天戈。不及戰。自敗而請和。是我。不速於和。而既和。則能久者也。予時上相。畢士安開其謀。次相寇準。堅其行。殿前高瓊。効控馬渡河之力。皆賴上意。先定於前年之征也。太祖再出征。真宗亦再出征。若其問罪河東。則太祖太宗皆一出征。陛下不一出征乎。其失之一也。圖功以威克愛者。政典也。政典者。軍政之典也。治國之常道。則威與愛均也。方有事時。漢景帝能誅晁錯。則天子之威令申。而七國之兵不足平也。晉武帝不能黜賈充。則天子之威令不申。而晉室亡。六胡之亂已肇也。唐肅宗之威令不申。而有郭子儀。李光弼為將。不能平幽薊。武宗之威令申。以石雄。張仲

武為將。而足以討澤潞。近者周世宗即位之三月。親征劉旻。及契丹。于上黨。其愛將樊愛能。何徽。敗績。世宗立取而斬之。將校股慄。思用命。而劉旻在太原。亦為之破膽失據。世宗之師。由是出無不勝。而四方僭叛。相顧失色。中國之威。一日而振。實為我有宋之驅除也。國家不幸。有敗國徽亂之日。為萬世之羞。非戰將一日失律之比者。曰京。曰真。曰黼。曰攸。曰方。金賊在城下時。宜梟以視之。又醢以賜之。因有詔。勅曰。此醢。非他物也。為人臣而不忠者。不度。事之利害。不慮國之安危。天命予一人。戮之。凡食者。誠焉無怠。彼金賊。雖非人類。而犬豕亦有掉尾怖恐之號。顧弗之懼哉。捨此而不為。其失之二也。兵出無名。事故不成。明其為賊。敵乃可服。古兵法之言也。唐高祖時。薛仁貴為蘇定方討賀魯。而言之。遂克成功。今國家於金賊。曾不遣一介之使。問其所以來者何名也。彼素臣事契丹。乃一日滅契丹之國。自建

隆以來。臣事我有宗。復一日舉烏合之衆。頌於堅城之下。果何名哉。設如我與國也。玉帛初陳。車傳未息。相與之。則當如是乎。無乃疆場相侵乎。請責之疆場之臣。否則將帥失信乎。請責之將帥之臣。今日果何名也耶。執事者既不責金賊之無名。又不明其所以為賊者。重可惜也。何則。自古兵之大禁。垂車深入則敗。猖狂不制則亡。貪人金幣則滅。有所恃而驕。則衆相屠。淹時而兵老。則下必圖其主帥。金賊俱犯此五者。我取而殲焉可也。執事者似未之明也。苟不明乎此。則敗亡反在中國矣。可不念乎。金賊之君。不知何人。恐非冒頓之暴勇。頡利之狡謀。可與為比也。其謀臣郭藥師者。唯能與我闇貫為謀。而貪墨無耻。如中輩借以資其身。取富貴爾。恐亦不可比。祿東贊之辭。婚可以動唐太宗。尚結贊之狂謀。幾能擒渾瑊。如俾郭藥師就一粗曉邊情。部隊將議之。不過一二言而唾叱之。天刑餘而又刑之。貫實

在部隊將之下者也。大抵不知其君。則視其將。不知其衆。則視其國。不知貧富。則視其器械。不知其所為。則視其所好。金賊之將如郭藥師。則其君可知也。其國之東西幾何。南北又幾何。朝臣高麗。暮臣契丹。介於奚。霄室韋。韃達之間。實彼群族帳之所賊者。今亟乞師奪馬而南。則其衆可知也。器械必資銅鐵。竹箭膠漆之上品。舉非彼之所產。宜其窳頓不剛。惟中國之器是求。則其貧富可知也。金賊之嗜好。大在金幣子女。細及耳目翫物。則其所為可知也。凡百亡國滅身之具。何其備耶。昔侯景所與同惡。無非駑才。其黨自嘆曰。乖僻至是。安得不敗。金賊似景。皆暴起而滅。必速也。苟明乎此。則何憚而不取。以殲焉。既此之不明。其失之三也。金賊不避利。水割地以河為界。執事者不盡河以賜之。姑賜高陽府中山府太原府。暨其郡縣。無慮名城將百數。自以為有謀也。不知今天下者。太祖之天下也。孰敢以一寸

土不在王會圖哉。高陽中山者。我太祖太宗暨周世宗躬冒矢石。艱難而得之者。乃一日談話而棄之耶。太原則太祖太宗相繼親征。冒矢石甚於河北。其艱難則久於河北。真宗自謂先帝竭四海之力。以得太原。顧弗重耶。又忍如墮甌而棄之耶。執事可不重諭之曰。彼初稱女真時。在我太祖朝。嘗盜我白沙塞三馬。適爾貢馬之使在闕下。太祖命執之不遣。明年渤海之使。為女真以表謝。過則釋之。其在太宗時。女真困於契丹之三柵。控告乞援。亦卑恭甚矣。不謂敢睥睨中國之地於今日也。此其失之四也。金賊其何獸。敢肆求黃金重幣。不知其幾何。但聞國家府庫空竭。下捃於公卿大夫士家。細不遺乎閭里民庶。其上逮宮幃供奉之器。則苟有人心者。不忍言也。方唐吐蕃縱橫凌轢時。入京城劫掠黃金。則必有之。亦不聞明言求金於王城也。其在鹽州夏州。則嘗求金矣。是吐蕃施於鹽州夏州者。金賊傲侮

於京城也。亦已甚乎。執事者。何不論之曰。府庫者。祖宗之府庫也。國家於經費之外。未嘗敢以一毫賞無功也。且國家初未嘗相聚斂之。臣亦無事於府庫之富也。又安得有金以滿谿壑之欲哉。在我國家之初。女真歲以市馬於中國。而資富。其後女真服事契丹。則中國但知有契丹之馬。而不知有女真之馬也。女真之名馬。遂亦絕種。得非天以其馬畀中國。而不畀契丹乎。女真又安得而私耶。以故不逞而南。唯以無馬為恨。塗路剽掠。而未知已也。彼窮餓不得吾市民之金。乃無名而金之求耶。夷狄皆貪而多詐。唯女真之貪而多詐。高麗猶賤之。雍熙間。嘗為吾使者詐之也。以黃金棄之溪壑。此其失之五也。春秋重信。盟生於不信。春秋是以誅盟。中國諸侯之盟。固在所誅。况以中國盟夷狄乎。又况於王人與盟乎。隱二年。唐之盟魯。與戎盟也。此春秋始隱之一端也。僖八年。洮之盟。二十九年。翟泉之盟。王人與

盟也。此春秋責齊晉之重者也。兵而不已，至於盟。盟而不已，至於質子。則又春秋之所不誅也。在漢唐時，但聞夷狄有質子於中國，不聞中國有質子於夷狄。禮則然也。金賊一日於王城下盟誓而質子，苟有明春秋之大臣，則其責當如何。無乃失中國之所以尊者乎。彼如有求質子而及親王也，何不論之曰：親王者，上皇之子也。陛下如堯親九族，忍棄上皇之子於胡虜乎。如質陛下之子，則就外傳未任武部之事也。彼雖犬羊，亦未必忘父子兄弟之親也。聞此言，恐亦聳然自失矣。又如求質宰相，則當諭之曰：宰相者，陛下之股肱也。何可一日而不相與以成一體乎。邦昌者，雖不知為何等人，既命之為宰相，則當待之以宰相也。彼亦號有君臣，則宜知宰相之重矣。亦聞此言而得安乎。雖然，質果何有哉。曹公因韓浩私呂布，不顧夏侯惇之被質，著令有持質者皆并擊勿顧。由是劫質者遂絕。此曹公所以能

振威中國也。中國不得其所以為尊者，其失之六也。然金賊一日得吾瀛定并門重鎮，未必能為其強。其得吾金幣無慮數十萬，未必能為其富。何則。夷狄喜相吞併，鬪爭是其犬羊狺吠咋嚙之性也。惟其富者最先亡。古今夷狄族帳大小見於史冊者百十，今其存者一二。皆以其財富而自底滅亡者也。今此小醜，不指日而滅亡，是無天道也。唯有一事大可懼者，又特遺之以謀臣也。遂將使此小醜得以其強者為強，富者為富，可不懼乎。國家以契丹歸朝官悉遣歸於此小醜，無乃執事者未之思乎。蓋此色人布滿州郡，無慮萬數。遠者十數年，近者三四年，且嘗預官聯臨局務，亦有喜讀書通吏事者。其便弓馬多膂力，喜戰鬪，則又其性習然也。且其中國之事體人物，靡有不知其孰強孰弱，孰能孰否，與夫道里而遠而近，而險而易，皆得以為此賊之謀。其害一也。此色人在中州，初頗喜自陳其曾高之家世，曰

此大家者吾之同祖也。曰此郡縣者吾墳墓猶存也。幸今復為王民。亦頗買田種藝與人家婚姻。其意不淺矣。亦頗有惜中國不用賢多遺才為司馬公而嘆息者。今一旦阻其慕王風之心。投之於大羊猪彘之群。則以其苦心為彼孽謀。其害二也。且彼與金賊亦有平日怨嫌不相能者。或當南北戰鬪時。兵刃相殘之酷者。今又一旦快彼賊心。其害三也。彼携老幼慟哭駕胡車。設弓露刃而行。籍籍道路間。言曰。投彼死爾。孰若死在此。以故所過之處。閉戶避之。既宿而去。則居者相賀。如其為彼用也。亦可慮哉。其害四也。金賊陸梁於城下時。此輩亦有請質妻孥願與之格鬪者。廟堂之謀。曾不知出此。而州縣固不敢上聞矣。此一大便。而資以為彼小醜之用。其害五也。彼婦自契丹而乃復歸之於金賊。不知為何名也。無乃示怯於金賊者。過甚乎。其害六也。使彼顧盼之間。褫中國之衣冠。復夷狄之態度。弱者羞

惡強者怨恨。道路為之咨嗟。非王有無外之度。非天無不覆之美。其害七也。明有此七害。而議者不過曰。廟堂有徙戎之論。為日久矣。適此特而徙之。不貽中國他時之害也。請復之曰。如可徙也。豈無異日。執事者幸少待之。徙之金賊。孰若待我國家廟堂之議成。復疆理幽薊之舊土。使彼復有仕於彼乎。且諸葛亮於南蠻四郡。皆因其土人而任之矣。借此萬餘人。皆無所知。所以增彼馳突之數。固亦不可。彼小族實難得生齒。所以汲汲是求也。昔朱克融輩方飢寒於京師時。從宰相乞一飽之日。而不可得。安知復有幽燕故巢。不忝其組。滔之風。終為唐室之害哉。如不用宣和七年以前詔書。復存之於中國。其失之七也。此賊蟻聚於城下時。入臣不知畫謀。不知一日縱敵。百世為害。戰士不肯盡力。留賊以累石父。圍人養虎自貽患。不勝責也。傳曰。無伏節死難之臣。孔子傷焉。可不信乎。設不能有鐘鼓舉而殲



之尚可震而逼之。什而圍之。使鳥不得度。馬不得嘶。此賊不忿而相搏。以死則無食而餓死矣。柰何既不得攻。又不得圍。縱其遊騎散卒。或百或十。朝出而殘一邑。又明日出而殘一邑。王畿根本之地。富室最多。適足以資其流血成溝也。王畿蕩滅將盡。遂及輔郡諸縣鎮。走官吏如鷄犬。取故相家孫女姊妹。縛馬上而去。執侍帳中。遠邇膽落。不暇寒心。然非金賊戕之也。實官軍戕之也。方賊入一邑。時未聞官軍一人襲而求救。咸謂彼出不意。而我適不為之備也。繼而日日相繼。破一邑。碎一鎮。亦莫有官軍一人來禦之者。乃知彼肆然以行。我初未嘗為之備也。以故知閻貫前日滅底河之敗。士卒死者十萬。不滅永洛之酷。朝廷莫得而聞也。貫感熙河經略使劉法出師。為西賊掩而殺之。如鷲童稚。朝廷受百官班賀。西師之捷也。近而劉延慶於雒州。北殪尸百餘里。而棄金帛。實於亂尸之中。不可稱數。并取雒

州弓手。天下稱為梟勇。而契丹亦所畏者。貫悉殺之。朝廷既不正典刑於延慶。而貫尋封王矣。法制之兵當如是乎。其失之八也。或曰。國家徵兵於方鎮。而未至也。前與之和矣。曰。城下之盟。有以國敗。不能從也。是春秋之法也。敢不守而行之。韓信之伐齊。先有酈食其與齊和矣。李靖之滅頡利。唐儉深入虜廷而和矣。薛仁貴之取九姓。先受其降。而知彼降者偽。則不若悉坑之之威也。是皆春秋之法也。何獨古人以縱金賊失之。無乃天下之士惡言孔子春秋之弊乎。雖然。徵兵於方鎮而不急奔命者。其故何也。漢陳豨反於代。高祖以羽檄徵天下兵。未有至者。高祖乃躬選壯士於邯鄲。蓋豨之罪未白於天下也。唐代宗有吐蕃党項京師之危。詔諸道兵。四十日無一人入關者。吐蕃党項雖為天下所嫉。而程元振李輔國凶閹之不君。復為天下之所忌也。天下豈不曰。元振輔國者。吾家之吐蕃党項也。塞上之吐

蕃党項。吾力可及。而吾家之吐蕃。凡項。吾力之不可及也。今閻賈之凶。燄出元振輔國上。既未梟而醢之。猶為天下之所忌也。然實因兵制驅之。而然者。何則。兵在州郡。則兵馴。而州郡重。兵專。命將則兵驕。而州郡輕。蓋將重則州郡不得不輕。將驕則兵不得不驕。惟州郡輕。則帥府輕。帥府輕。則京師輕。此天下之勢也。祖宗之兵。寓於州郡。命其守臣曰。知州軍。以其軍重某州也。其將則州都監是也。州郡都監。平日事其守臣。卑且謹。則其兵無自肆也。此祖宗之兵制也。開寶之兵。三十七萬。是謂必勝之兵。至道之兵。六十六萬。是謂威武之兵。天禧之兵。九十一萬。是謂太平之世。保大之兵。一百二十五萬。是謂吳賊之後。應變之兵。皆以根柢京師。而枝幹四方。宜其百世莫得而加損於一日也。乃有大臣。壹一變更祖宗之法度。兵制亦不得而在。合數州之兵。以為一將。將重而州郡輕矣。州雖有兵之營幕。而

窘於月食時衣。其號令之所加。進退之所繫。則在將而不在守臣。以都監而領剩員。廂軍之外。不知將司一事也。將兵視州民。如胡越。將官待守臣。如寇讎。又有大可懼者。幸宗廟社稷之靈。無回戈吞噬之變。則昧者未之諭也。唯司馬溫公。熙寧中在洛下。見留守前宰相韓絳。以十數老弱之卒。奉旨禱雨中岳。而將兵有出城之禁。奏疏論之。曾布帥太原。躬自不勝。將司之無禮。而終不以將法為非也。此者不幸有金賊之役。如徵舊州制之兵。則詔至一州之日。則一州之兵。奔命而東上。不必待於他州。切恐州之我先也。州兵之急於用也。今徵新法之將兵。而將兵分隸數州。必合而起之。又各仰其州之錢糧。以資之。是州兵一日之事。為將兵累日之事也。將兵之不可急用也。如此。國家承平既久。人材不甚相遠。都監之材武。不知視將官果如何。唯閻孺之役。商旅之族。乃得超授將官。而都監孤寒。以考第平進者。

不敢與之比也。此州郡兵制之失。使其赴援不時之弊也。若其京師  
兵制之失。使其寡弱不足以為京師之重。而威乎天下者。亦其自變  
更。祖宗之舊制也。祖宗知漢唐都雍與洛。以河山為險。而河山之險  
人可更而有也。今都汴陽。無河山為險。而唯以人為固。乃屯重兵於  
京城之下。或分糧於京畿之邑。他人莫得而重輕之。唯我以為用。  
是本朝以兵設險。險於雍洛之河山也。奈何喜變更之大臣。銷去祖  
宗傳城之兵營。曰坐糜太倉無用也。曰闕額之金。因得以為利也。閑  
地可以利室廬也。大臣而淺且陋。一至於此。安知百世之安危哉。宋  
守約自以併營為功。聞於一時矣。使我翊衛京城之兵營。十無一存  
者矣。今之貴臣強宗。則為別館園囿。與夫道官釋宇者。皆昔之營地  
也。後生但誇今日遊觀之雄。孰知昔者宿兵之雄哉。倘如祖宗之舊  
制。城外之兵營。幕布相望。而警效之音。日夜徹乎數百里之間。使四

夷來朝貢者。遠而望之於鬱葱佳氣之外。有森然不敢仰首之威光。  
則彼金賊雖欲喘息於城下。而無以留旦暮也。祖宗以兵為險。而城  
不必高。池不必濬也。吾之京師。是謂天邑。是謂神臯。其守唯在四夷  
也。由是觀之。祖宗京師之兵制。優於唐之府衛多矣。唐之府衛遠。而  
不若我之近也。唐之府衛勤於命將。而我初不命將以私之也。內外  
兵制。繫國安危。其失之九也。幸而有三策焉。曰命威望之大臣以守  
魏。而高陽可保也。命威望之近臣以守鎮。而中山可保也。在唐則魏  
博重於鎮。冀鎮冀重於幽燕。魏博鎮冀合而制幽燕者也。祖宗於河  
北建四鎮。而河東唯太原一鎮。其旨微矣。今不得已於晉於路。或擇  
建一鎮。或各建一鎮。則太原可保也。此重鎮之策也。於河北河東。揀  
擇守臣。文武並用。待之則厚。委之則專。於轉運使提點刑獄之外。無  
繁碎旁午之使者。以蹂踐之。搏噬之。則金賊雖得吾州縣。而無德乎

人者。安能一日而居哉。大要如太祖時。郭進於邢州。李漢超於閩南。何繼筠於鎮定。賀惟忠於易州。李謙溥於隰州。姚內斌於慶州。董遵誨於通遠。王昇於原州。不滅唐。李抱真於澤潞。馬燧於太原。雖曰崎嶇於劇賊之中。而威震於羣戎之上。吾民既安矣。何恤乎小醜。夫然後於民給復者五年。米之猶二年。明詔曰。山澤之利。與爾共之。吾不禁也。益食之貨。爾專有之。吾不與也。爾無種糧。則吾給之。爾無牛耕。則吾界之。爾無農器。則吾鑄之。於是乎十數年流轉四方之民。不約而無遠邇來歸矣。唐宣宗何德。以復累世所亡河湟之地哉。而能以恩惠顧於既歸之後。猶不失春秋重民之道也。此內治之策也。遠交而近攻者。范雎之謀。唐太宗為能用之也。王者之師不必出。而以夷狄攻夷狄。則王者之師不戰也。國家之制。遷賊命于藩羅。支其制元昊亦命乎喃廝羅。是世効忠順。以報朝廷者。一旦滅之。為郡縣。今熙

河是也。無日無烽燧之警。今因金賊陸梁之後。至然大變其政。得重使如唐賈林本朝曹利用之類。以告室韋奚霫靺鞨諸蕃。鳴金賊之罪。而四攻之。金賊何地。以苟活哉。若高麗則金賊素所臣事者。我之厚高麗者如何。其為我緩急之役當如何。將見金賊雖欲苟活。不可得也。春秋之功。莫大乎存亡國。孔子猶書衛人立晉。不與齊侯之專封。而大天子之命也。今天子為能命韓昉輩訪耶律之後。禮而立之。則九夷八蠻。罔不仰中國之至仁。服陛下之不德。非特為耶律氏再生肉骨之恩也。仁之所施者深。則誠之所歸者廣。於是乎耶律氏為我藩籬。蚤虱金賊而湯擗之。凡厥馭薊諸郡。恐却之。而必以歸也。漢光武不肯從臧宮馬武之謀。因匈奴衰亂而取之。乃立南單于以制北單于。唐太宗雖曰滅頡利。而立突利可汗。使率其故部。示不滅人之國也。故曰。兵所以存亡繼絕。救亂除害也。今何憚而不為此外交之

策也。唐代宗有郭子儀為將。吐蕃內侵相繼五年。德宗有李晟為將。而吐蕃內侵相繼三年。則今日之憂未易以一冬一春必也。廟堂之上可遽緩帶乎。借如三鎮之地已無及。而三鎮之餘猶可及也。今日之師以無補。而明日之師或尚可補也。皮膚之疾愈而却醫可也。心腹之疾猶存而醫未易却也。

歷代名臣奏議卷之二百二十一

家也居於家者有欲求其  
而止者有欲相繼三年則  
上可達後帝乎謂也三鎮  
之節以無輔而明且之神  
股之款備存而醫未易也

歷代醫家集卷之六十一

